

Media : Harian Metro

Date : 24 Nov 2015



Ganding bahu lestari kampung

Kalau ditanya siapa sukakan kebersihan, semua orang akan angkat tangan. Ya, memang tiada siapa yang suka persekitaran kotor. Namun hakikatnya, apa yang disukai itu sangat bertentangan dengan tindakan kita selama ini.

Ada segelintir masyarakat yang tidak segan silu membuang sampah di merata tempat, bahkan ada yang mencampaknya daripada kereta!

Keperluan mempunyai negara bersih khususnya di kawasan tempat tinggal yang sangat mendesak mendorong Ajinomoto (Malaysia) Berhad mengadakan kempen gotong-royong 'Hari Bersama Membersihkan Alam Sekitar 2015'.

Dalam kempen kali ketujuh ini, ia bekerjasama dengan Universiti Putra Malaysia (UPM) menerusi Program Kesihatan Senyum Selalu Bersama Penduduk Penderas 2015 di Kampung Penderas, Kuala Krau, Pahang.

Atas tujuan memupuk pembangunan persekitaran yang lestari dan mahu meningkatkan kesedaran masyarakat untuk mengatasi isu alam sekitar yang dihadapi kini, aktiviti 'Go Green' dan 'Clean Up' diadakan sempena kempen gotong-royong ini.

Seramai 39 kakitangan Ajinomoto Malaysia dan 41 siswa UPM teruja melihat kesungguhan 50 murid Orang Asli dari Sekolah Kebangsaan Penderas untuk

bersama-sama membersihkan serta menghijaukan kampung mereka.

Idea 'Go Green' ini diilhamkan daripada inisiatif untuk mengadakan kebun sayur mini di Sekolah Kebangsaan Penderas sebagai sumber nutrisi pemakanan harian pelajar asrama.

Usaha ini juga bertujuan menggalakkan pengambilan sayur-sayuran segar di samping menjamin bekalan makanan yang mencukupi. Aktiviti 'Clean Up' pula membabitkan aktiviti pembersihan seperti memungut dan pengasingan sampah di Kampung Penderas. Selain membersihkan kawasan, ia juga bertujuan meningkatkan kesedaran masyarakat mengenai kitar semula dan cara mengekalkan kebersihan persekitaran.

Dalam tempoh dua jam setengah, lebih 60 anak benih tiga jenis sayur-sayuran ditanam dan 118.7 kilogram sampah dikumpulkan.

Ternyata kedatangan orang luar membangkitkan semangat kanak-kanak di situ untuk sama-sama memelihara kebersihan kampung mereka.

Pengarah Urusan Ajinomoto Malaysia, Keiji Kaneko yang meluangkan masa 'berkebun' bersama-sama peserta turut menyampaikan barang keperluan harian sebagai hadiah kepada kanak-kanak yang terbabit dalam kempen gotong-royong.